



OFFICE OF THE GOVERNOR AMERICAN SAMOA GOVERNMENT

Fa'afetai a le Kovana

O lea ua fa'alava le Aniva ae talafulu Manusina, ina ua tini pā'ō nei le uto, ma ua tau le 'ai e pei o le faiva i tapalega, ua so'oula fo'i le titi o Manaia. Ua malie le maimoa, ua malie fo'i le silasila a le Faigamalo, fa'apea malo fa'aaloalogia. Ua tufala fo'i le lafoga ina ua lafo le tupe sa paopao e ailua, o lea ua sapisapi le niuavaga.


Ou te mua'i seu fa'aaloalo atu ai i lau Afioga i le Ao Mamalu o le Malo o Samoa, lau Afioga ile Tamaaiga, Tuia'ana Tuimaleali'iifano Sualauvi II ma le Masiofo, fa'apea lau Afioga i le Sui Palemia ma le faletua. Talofa ua viliviligia fa'amatagi sau silasila, ma ua vela fo'i le fala, ae peita'i sa mau pea le to'ovae ma lagotapu le maimoaga i lau Afioga. Malo le tapua'i, fa'afetai le fa'amamalu. Ua uli ma sao le Aso o Tutuila ma Manu'a, ae sa molimaunina pea lau tapua'iga fa'atupu. Fa'afetai le tali fa'aaloalo. Fa'afetai le fa'amamalu atunu'u.

Le pa'ia o le nofo i Fa'afeagaiga i fata faitaulaga e fia i Amerika Samoa, ua taunu'u lenei Aso ona o a outou talosaga. O outou lava o paegausi o le Talalelei e fa'avavau. Ia outou maua pea le upega lauga fa'aleagaga, auā le Atua ma lona finagalo Pa'ia.

Le Pa'ia o Eklesia na fa'afafia, ua tu maualuga la outou tapenaga, ina ua sasa'a outou faiva i malae ae maimoa Amerika Samoa ma le lalolagi atoa, fa'afetai le tali valaaulia, fa'amalo le tapena. Le mamalu o Afio'aga ma o latou fautasi, ua fa'amalo le sua fa'atamali'i. Ua sisi le atumua ina ua fa'aeva lo outou fa'amoemoe, ua malie le faga nai Foa. Le Paia o Matagaluega 'ese'ese, ma Au faipisinisi, se ua olo nonofo le tapua'iga i maota ia, ona o lo outou lagolagosua i le fa'amoemoe ua mapu'e ai Amerika Samoa i lana sisiga fu'a o lenei tausaga. Faafetai fo'i i Au faipisinisi i la outou foa'i tau seleni, o lo outou sao lena mo lenei Aso taua. O fa'alapotopotoga tu ma'oti aemaise o savaliga fa'aaloalo o lenei taeao, ua lilifa vanu, ae atoa le masina ona o lo outou sao mo le atunu'u ma lana Sisiga Fu'a. O le mamalu fo'i o ta'ita'i o vaega'au aemaise le fa'aili savali a le Malini (US Marine Band) na malaga mai fafo, ua le fa'atumutumu lima lo outou so'oso'o tau'au e ui lava ina mamao ala, ae ua fa'amalo'ulo'u mai ona o le alofa moni. Fa'afetai fo'i i le 'ausiva mai Samoa ma 'au ta'alo i lo outou fa'atasi mai i lenei Aso, ia saga fa'amanuia le Atua.

E mulia'i se fa'afetai i le mamalu o le Komiti Fa'afoe, lau Afioga i le Kovana Lutena Talauega ma lau Afioga i le Maoputasi Mauga. O upu e fai i le itulagi lea i Sisifo, se ua outou si'i Amerika Samoa i luga o le mauga. O le fatu lena o la outou tautua malo sa va'aia i le Aso o le Fu'a. O le ma'a fuligatā, a o lenei ua outou fuli e ala i tapenaga matagofie mo le fa'amanatuina o le Aso fiafia o Amerika Samoa, fa'afetai le faitaulaga ma le tautua malo.

Afai e tatala le upega ma lafo le taula i malolo, ia folau i lagi e mama lau afioga i le Ao Mamalu o le Malo o Samoa, ma le pa'ia i le Au vala'aulia ma malo fa'aaloalogia. Ia ta'ape a fatuati ma ia saogalemu Amerika Samoa i 'a'ao agalelei o le Atua. Soifua.



LEMANU P. S. MAUGA
Kovana